

國朝耆獻類徵初編卷二百九十七目錄

將帥三十七

文圖

巴圖什里

圖桑阿

李南馨

阿蘭保

劉之仁

和倫

綸布春

成德

蘇靈

潘韜

子汝渭

常懷義

蒼保

國朝耆獻類徵初編卷二百九十七

通奉大夫前署江西巡撫江西布政使司布政使湘陰李桓輯
將帥三十七

文圖

文圖滿洲正紅旗人姓呼爾哈乾隆二十一年襲雲騎尉世職二十九年授三等侍衛三十三年襲世管佐領三十六年授前鋒侍衛四十一年擢前鋒參領四十二年授嚮導處印務章京四十五年出烏里雅蘇臺兵差五十一年發甘肅以副將用尋補中衛協屢署甯夏涼州肅州等鎮總兵六十年署陝西興漢鎮總兵嘉慶元年十二月陝西巡撫秦承恩以湖北邪匪擾近陝境飭文圖領

興漢鎮兵千名馳勦賊聚湖北竹山竹谿文圖兵至蜡玉河奮擊
之生擒賊目王見寅等殺賊四百有奇奏入 上以文圖帶兵一
入楚境卽殺賊四百餘人足使賊人聞風膽落嘉獎之文圖隨帶
兵分路痛勦將蜡玉河賊匪全行誅滅三月賊匪羅進等在羊角
山四出搶燒復帶兵由清吉溝渡河斬首百餘級餘匪奔竄預設
伏斷其後路追至雙竹園夾擊之殲賊殆盡生擒羅進等父子四
人奉 旨交軍機處記名遇有總兵缺出卽行升用嗣大學士署
四川總督孫士毅以賊匪偏近來鳳馳奏 諭曰文圖前往羊角
山勦賊甚爲奮勇著加恩賞戴花翎卽令酌帶兵丁由竹山一帶
取道來鳳沿途遇有賊匪卽可順路殲除以便會合樊繼祖與孫

士毅兩面夾攻更可得力四月文圖與將軍恆瑞先後抵竹山盡
誅賊匪復分路前赴保康堵禦三里坪賊匪擊殺三千餘人生擒
首逆祁中輝曾世典賊奔聚東山長嶺文圖與恆瑞等痛加殲戮
落崖澗死者無算 賞訥恩德巴圖魯號 諭曰文圖勦賊甚爲
奮勇見在巴東一路營汛單虛恐賊匪乘閒滋擾著傳諭文圖卽
刻帶兵由興國州一路速赴巴東等處勦殺賊匪如該處賊已勦
淨而惠齡在深衝口尙未擒獲賊首卽著文圖幫辦尋以永保等
奏請會勦襄陽逆匪又 諭曰文圖昨令前赴惠齡處協同勦賊
今仍著恆瑞等酌量情形如惠齡處可無須文圖急於前往卽令
該署鎮先赴襄陽會合攻勦五月文圖追白雲寺賊至喇叭洞

上以攻圍已越多日於該處賊匪淨盡後卽帶兵速赴榔坪一帶
勦辦尋恆瑞等以文圖勦殺喇叭洞賊匪淨盡馳奏 諭曰文圖
前在竹谿竹山勦辦賊匪屢次出力茲又將喇叭洞之賊全行勦
盡肅清鄖陽一路殊爲奮勉可嘉文圖俟有總兵缺出卽行擢用
仍交部議敘文圖奏曰白雲寺賊逃至喇叭洞臣親率興鎮兵協
同襄陽鎮總兵彭之年四路圍勦賊滾崖斃者約七百餘殺死者
三百餘生擒教首莊正朝張宗玉等並擒首逆王蘭解京 諭曰
文圖自到鄖陽以來屢次攻勦賊匪打仗得勝帶領興漢鎮兵日
久與弁兵相習調遣更爲得力卽著加恩補授興漢鎮總兵六月
攻取丁家大山賊卡偕湖北巡撫惠齡會勦賊潰奪白家壩卡又

乘勝占據羅羅洞賊卡奏入得 旨文圖著加賞提督銜遇缺卽升時灌灣腦賊張正謨等勢甚張文圖分兵駐縣羊腦山梁扼其隘圍之七月連獲楊樹壩青草窩二卡賊由灌灣腦箐箕壩兩路飛奔而上我兵潛伏不動俟半入卡內槍礮四起賊驚竄入卡跌落溝濠者不可勝計生擒張文宗等六十八名奏入得 旨著賞欽松石帶版八月賊據王母洞獅眠坳山溝文圖與成德惠齡三路進攻盡誅之生擒賊目彭佳兆等四十名旋以榔坪賊匪滋擾歸州巴東長陽一帶復馳赴迎擊九月擊殺榔坪賊匪二百餘生擒八人搶獲大礮一座及器械贏馬隨分派將弁守卡值霧雨四塞賊潛至卡邊文圖豫令兵用繖遮護槍礮賊至登時并發斃五

百餘人生擒賊目潘學僧心海等三十三名尋進攻蓼葉口賊卡
有長衝卡賊率眾接應我兵擊斃無算追至長衝賊卡又斃百餘
人奪其卡均奏入得 旨交部議敘十月由蓼葉口進兵擊賊於
沈香溪山坡賊由獅子巖偷渡文圖帶兵夜繞道行抵張家口見
滋邱賊巢火光燭天正在搶渡出其不意槍斃甚多生擒賊黨胡
宗榮劉應祿等奉 旨補授雲南提督未幾滋邱賊匪逃至黃柏
山潛匿 諭曰滋邱賊匪復逃至黃柏山潛匿殊出情理之外文
圖在關口黃連坪駐劄而賊匪於初六日搭造浮橋至十三日接
到補授雲南提督諭旨竟於十九日起身赴滇置逃竄黃柏山之
賊匪於不顧尤爲畏葸可惡所有前賞花翎及巴圖魯號俱著革

去姑雷提督之任令其帶罪圖功以觀後效文圖見已回至軍營
卽著成德文圖分往賊營之西南鶴峯州東南長樂縣界帶兵防
堵儻若再不能堵截又任賊匪由所守之處逃逸則二人二罪並
發必於軍前正法決不寬貸十一月文圖遵 旨帶兵由黃柏山
進攻十二月至雙龍寺與副將樊雄楚許文謨等遙爲聲援分路
堵截力扼賊於獨石坪大破之隨撲進西流溪又斃賊二百餘二
年正月黃柏山賊匪恃險負嵎文圖會合成德攻剿連獲賊卡二
座奏入得 旨賞金盒一箇綠玉扳指一箇大小荷包等物嗣賊
由楊家寨直撲而前文圖復同成德分投攻剿先後擊殺三四百
人生擒周之文等二十三名獲器械百餘奪其寨由黃金嶂進兵

擊退西流溪賊時署四川總督福甯拏獲奸細黃士榜知會文圖
加意防範賊果乘夜潛來我兵齊出奮擊跌巖死者無算文圖遂
移兵攻撲小薄道嶺 諭曰此次官兵打仗不避危險奪據要隘
阻遏賊人出路文圖著交部議敘三月攻小薄道嶺賊卡賊由山
溝潛出殺斃無算旋隨額勒登保攻黃柏山賊匪進逼四方臺得
旨嘉獎四月額勒登保以金雞口至天池口爲糧運要路令文圖
往來稽查七月防守滋邱河絕賊渡旋以巴東江岸賊匪肆擾帶
兵赴宜昌歸州一路迎頭截剿十一月防堵巴東江北岸又以長
樂縣賊匪潛出會同湖北按察使張長庚撲剿奏入 諭曰文圖
旣帶兵前往尤當出其不意一鼓殲擒勿使與長樂縣賊匪合夥

方爲妥善十二月由長樂縣搜勦覃加耀逸出之賊三年正月賊聚終報寨額勒登保以山係懸崖峭壁設法三面仰攻令文圖在東路攻擊二月帶兵駐鄖陽堵大甯賊匪三月川省賊首劉成棟偏近遠安南漳偕湖北巡撫汪新馳赴保康迎擊尋復至南漳截擊遏其西北奔路奏入 諭曰文圖等由南漳截勦正可前後夾攻毋任輾轉逃竄四月川匪張漢潮等竄入楚境文圖奮擊於荊門州屬之石牌因眾寡不敵陷賊圍中左脅受槍傷仍強騎突陣出五月傷漸平駐兵漢江東岸六月川匪王三槐竄入大甯湖廣總督景安奏咨會文圖前往歸巴界駐劄堵禦得 旨務須察探賊蹤實力堵截勿再任竄入楚界慎之七月景安奏文圖受涇過

巴圖什里

巴圖什里博爾濟吉特氏正藍旗蒙古人由健銳營前鋒隨征伊犁烏什暨緬甸新街戛鳩皆有功乾隆三十二年襲世管佐領四十六年授貴州提標前營遊擊五十年二月因督緝逃兵未獲革職畱任五十一年十一月 特旨開復五十六年遷丹江營參將六十年二月黔苗石柳鄧叛於松桃廳糾連楚苗滋擾閏二月隨總督福康安由銅仁進撲嗅腦賊潰乘勝克石城燬巖峒寨斃賊無算又進攻馬乾溪暨青魚塘五月由葫蘆坪攻克黨槽三家廟等苗寨奪卡七座 恩賞荷包十月擢定廣協副將進攻鴨保寨嘉慶元年四月進剿天星寨爆木營等險要山梁又進奪納共山

貴道嶺等石城石卡旋攻火麻營追賊於河溪渡口撲水斃者甚眾遂克乾州十一月隨將軍明亮由楓形山進攻貴魚坡之南晝夜轟擊奪據馬頭山要卡十二月由貴魚坡進剿石隆寨大兵雲集槍斃逆首石柳鄧獲其子石老喬二年正月貴州狎苗王囊仙七綽鬚等滋事三月隨總督勒保由關嶺進剿時滇黔路阻巴圖什里帶兵自安南縣馳赴永甯據盤江鐵索橋進攻黃土坡奮勇撲擊立解永甯城圍奏入得 旨議敘並 賞戴花翎旋帶兵在普安縣一帶防禦賊匪因黃草壩一帶攻剿緊急間有竄至普安者當卽剿捕淨盡 諭曰巴圖什里將普安一路賊匪殲除所辦亦好著咨部議敘五月在普安之小歹蘇打峯巖一帶捕獲逆苗

沙河三等六犯六月 上以巴圖什里敗賊永甯勦撫普安功

賜敦勇巴圖魯名號閏六月帶兵防堵雲南邊界旋由黃泥河分路
進擊黃草壩與知府屠述濂會兵勦於壩城之豐塘接合滇兵滇
黔之路遂通八月攻三卡寨獲賊目韋阿谷等九月獲賊目韋阿
尼等乘勝追擊至補路獲漢奸雙文奇等并賊匪二百餘名補路
踞山臨溪形勢僻阻巴圖什里與總兵施縉等分路進攻駕橋馳
渡焚燬賊巢乘勝進攻壩郁嵯峒岵嵩等苗寨至黃草壩一帶賊
眾悉就殲戮得 旨議敘十一月遷永州鎮總兵三年搜查安順
興義及補路壩郁一帶餘匪蕝事以功 予優敘六年七月卒於
任子那蘇圖見龔世嘗佐領

右
國史館本傳

圖桑阿

圖桑阿滿洲正白旗人姓董鄂氏一等公費揚古孫一等侯圖巴子乾隆十年襲一等昭武侯兼雲騎尉十四年授藍翎侍衛十六年擢三等侍衛二十八年擢二等侍衛二十九年襲世管佐領三十三年三月授京口副都統四月調江甯左翼副都統三十三年以失察披甲容畱民人私鑄降二級畱任三十四年五月諭江甯兵數無多原設副都統二員內裁汰一員圖桑阿著來京另候補用是月仍授京口副都統三十八年奏請武職參將以下照文職回籍丁憂諭曰父母之喪解任丁憂原係人子各盡孝道亦應視事之當然酌辦文職例應丁憂亦有經督撫奏請在任守制